

Judas

Judas quintlahpaloua in tlaniltocanih

¹Neh Judas, nitiquitcatzin Jesucristo, neh nicniu in Jacobo. Innamechontlahcuiluilia nameh-uantzitzin, naquin in toTahtzin Dios onamechontlasohtlac uan onamechonnotz, naquin namech-mopialihtoc Jesucristo.

²Intlahtlani ocachi uan ocachi mamomiquiltihti niteicnoitalitzin, niseuiltzin uan nitetlasohtlalitzin Dios namonauac.

In tlamachtanih tlahcayauanih icsilisqueh tlatzacuiltlis

(2 Pedro 2:1-17)

³Notlasohicnluan, simi onniquia innamechontlahcuiluilis den totemaquixtilis tlen itsepanpiah, pero axan yeh omonic innamechontlahcuiluilis innamechonnahnauatis simi ixconpaleuican in tlaniltoquilis tlen Dios ic sipa oquinmactih niacxatzitzin.

⁴Inquita ohcon omonic nic siqui tlacameh ica tlahcayaualis yocalaqueh namonauac, de nin-

queh yomihcuiloh desde yaueh-cau, yasqueh itich in tlatzacuiltlis. Yehuan amo ictlepanitah Dios, uan quicuih nitetlasohitalitzin Dios queh se nitlamil para tlah-tlacosqueh. Yehuan amo icsiliah Jesucristo naquin san Yehuatzin toueyitlayacancau uan toTecotzin.

⁵Inniqui innamechonilnamictis itlah tlen ya nanconmatih: In toTecotzin oquinpaleuiah in tocnian de Israel ihcuac oquinquixtih de Egipto, masqui ohcon satepan Yehuatzin oquinpohpoloh naquin amo otlantlacaqueh.

⁶Noiuqui in iluicactlatitlanten tlen amo ocmouisticmatqueh in tiqui-uahcayotl tlen Dios oquinmactihca, tlamoyeh occauteuqueh ninchan, yehuan Dios oquintzacu itich in tlayouilotl tlen ica in sintitl nochipa, uan ompa quinchialtihtoc in ueyi tonal ihcuac Yehuatzin quitas tlenoh icnamiqui sehse.

⁷Noiuqui in Sodoma uan Gomorra uan in altipemeh tlen ocatcah tlanauac, samayeh ohcon oaxqueh quemeh yehuan. Pitzotic oaxtiniqueh ica nintlalnacayo,

uan oquinpactih mocalaquisqueh iuan nintlacaicniuan. Nic ohcon occhiququeh, ocsilihqueh in tlatzacuiltl ica in tlitl tlen ica in sintitl nochipa, uan non mocaua queh se nehmachtilis tlen ica mattlasalocan tehuan.

⁸Sannoiuqui ohcon necateh tla-cochihitanih icpitzotiliah nintlalnacayo, uan amo ictlepanitah naquin imac catqui in chicaualis tlen ica uilis quintlatiquitis, uan pitzotic quinteneuah in chicau-lismeh tlen cateh iluicac.

⁹Uan yeh ixconmomacacan cuenta, ihcuac in tlayacanqui iluicactlatitlantli Miguel omotlahtolixnamic iuan in amocuali uan amo occauilil nintlalnacayo in Moisés, dion yeh amo omixeuih quihtlanis tlatzacuiltl ica pitzotic tlahtol, yeh san oquiluih: “NoTeco Dios mamitztlatzacuilti.”

¹⁰Pero nicancateh tlacameh pitzotic icteneuah hasta tlen yehuan dion amo cahsicutah; uan quemeh tlahpialten tlen amo moyoluih, san cahsicutah uan icchia tlen quinyoltilana uan ica mihtlacouah.

¹¹¡Ay tlasohtzitzinten yehuan! Ocpipinqueh niohui in Caín, uan ica nintominxihxiciyo yomosintemactihqueh itich in tlahtlacol quemeh tlen oquichiu Balaam, uan nic teixnamiquinih quemeh Coré, sannoiuqui ohcon pohpoliuisqueh quemeh yeh.

¹²Yehuan san namechonpipinautiah ihcuac namonmonichicouah itich in cenahilnamicocatl den

toTecotzin, quen amo ixpinauah ica xihxiciuyotl tlacuah. Yehuan queh tlahpixqueh tlen motiquipachouah san icniquih yehuan ixuisqueh. Yehuan quemeh in mixtli tlen amo cualica quiyautl, tlen in ehecatl icuiiica san cayasa, yehuan quemeh in pomeh tlen amo ictemacah nintlatiyo ihcuac ehco in tonal quintlatiquisiqueh, opatica yomiqueh uan tlauiuitlaten ica nochi nintlaniluayo.

¹³Yehuan temohtihqueh quemeh in atl tlen mahcocui chicauac itich in mar, uan icnextiah nintepinautihchialis quemeh in mar iclattiua nipitzoticposocyo. Yehuan quemeh in sitlalimeh tlen amo icpiah imohui, uan quinchia in tlayouilotl tlen ica in sintitl nochipa.

¹⁴De yehuan ihquin yoctematitihca Enoc, naquin ya ic chicomepa tecone ualeuani inauac Adán: “Ixconitacan, oualmouicac in toTecotzin inuan miqueh miles iluicactlatitlancauantzitzin,

¹⁵oquihtoco tlenoh intich moniqui nochtin in talticpactlacameh, uan oquintlatzacuiltico nochtin naquin amo ictlepanitah Dios. Oquintlatzacuiltico ipampatica nochi nimamocualichialis tlen occhiququeh, uan nic amo octlepanitaqueh Dios, uan ipampatica nochi in pitzotic tlahtol tlen nonqueh tlahtlacouanih oquihiluihqueh Yehuatzin.”

¹⁶Yehuan amotlen icuilitah uan nochi sa quihitohoqueh. San ictemouah icpaquilismacasqueh

nintlaniquilis. Tlemach non momatih quen tlatlahtouanìh, uan tla quinuehcapantlaliah in tocnìuan, ohcon icchiuah yeh nic icniquìh quinquixtilisquèh itlah.

**Judas quinnahnauatia
uan quinyoleua**

¹⁷Tlen quemah, namehuantzìtzin, notlasohicnìuan, ixconilnamiquican tlen yonamechoniluihcach niteotlatitlancauan in toTecotzin Jesucristo.

¹⁸Yehuan yonamechoniluihcach: “Itìch niyacatlamìyan in tonalmeh isquèh tlapinauanìh, yehuan nini-misquèh ohcon quemèh ninpitzo-tictlaniquilis.”

¹⁹Nonquèh, yehuan naquìn quim-ixnamictlaliah in tlaniltocanih; icchiuah san tlen yehuan intlaniquilis, uan amo icpìah in Espìritu Santo.

²⁰Pero namehuantzìtzin, notlasohicnìuan, ocachì xonmoscaltìhtacan itìch in mouisticchipauac tlaniltoquilis, uan ixconmonochilican Dios quen namechonyacana in Espìritu Santo.

²¹Uan amo xonmihcuanican de nitetlasohitlaltìtzin Dios, yehyèh ixconchixtocan in tonal ihcuac in

toTecotzin Jesucristo ica niteicnoitalìtzin techmomactilis in yolistli tlen ica in sintitl nochìpa.

²²Naquìn yolometìh, ixquimonmatlanìcan matlaniltocacan yec.

²³Ocsiquìn ixquimonquixtìcan den tìtlì, uan ohcon ixquimonmatlanìcan maìcan tlamaquixtilten; uan ocsiquìn ixquimonìcnomatìcan, tlen quemah, ixconchiuacan non ica mic tlamaluìl, amo yèh namechonmahmauah, uan xontlamouìlican hasta de nintilmah tlen yocmahmauquèh ica ninpitzo-ticchiualis.

Tetlacachiualis inauactzìncò Dios

²⁴Yehuatzìn chìcaucatìzintli amo techoncauas matuitzìcan, uan chìcaucatìzintli techteixpantìs imouistiquixpantìzìncò itchipauaqueh uan ica ueyì paquìlistli itìch in to-yolo.

²⁵San Yehuatzìn Dios, uan techonmaquixtìa ica in toTecotzin Jesucristo. Inauactzìncò Yehuatzìn maì in uehcapantlaliìs, uan nochì ixquìch tlen mouistic, uan in ueyitiquìuahcayotl, uan nochì chìcaualis, desde ipeuyan nochì, axan, uan ica in sintitl nochìpa. Amén.